

եւ Խաթունիկի նստելու ձիաների սարքը պատրաստեր, վաղ առաւօտեան գարին տար, որ հովով ճանապարհ ընկնէինք: Դարձայ իմ սենեակը մուլթը բաւականին թանձրացել էր: Մարօն ամէն օր այս ժամուն ճրագ էր ներս բերում. այսօր, երեւի, այնքան զբաղուած էր, որ մոռացել էր, թէ ես նստած եմ խաւարի մէջ: Մեծ եղաւ իմ զարմանքը, երբ տեսայ փոխանակ Մարօին յայտնուեցաւ Մարգարիտը ճրագը ձեռին: Մօր փեշից բռնած, ներս մտաւ եւ փոքրիկ Սալբին – Յասօի անդրանիկը – եւ մի այնպիսի վախկոտ երես էր շինել չորս տարեկան երեխան, կարծես երկիւղ ուներ՝ չիցէ թէ մօրը խլէն իր ձեռքից:

Մարգարիտը ձգած ուներ կարմիր քօղը գլխին, որ առջեւից ծածկում էր նրա երեսը մինչեւ գօտին, իսկ ետեւից՝ բոլոր մէջքը: Նա առանց քօղը բարձրացնելու, լուռ գլուխ տոեց եւ դրեց ճրագն իր տեղում: Ինձ երեւաց, որ նա չէր ուզում հեռանալ, որպէս ասում են՝ ոտքը քարշ գցեց, կարծես ուզում էր մի բան ասել ինձ: Նա կանգնեց ինձնացի փոքր-ինչ հեռու դռան մօտ, իսկ Սալբին տնկոեց մօր առջեւը: Մայրը խթեց դստեր կողքը, դուստրն իր փայլուն աչքերը դարձրուց դէպի նա եւ հարցրուց.

– Ի՞նչ աշեմ:

Մայրը թեքեցաւ, Սալբիի ականջին փսփսաց մի խօսք:

– Աշա՛յ, ախպեր, ախար եշ էլ խեղճ եմ...

Սալբին շփոթեցաւ, նա մոռացաւ մօր ասած պարբերութեան կէտը: Մայրը կրկին խթեց նրա կողքին եւ փսփսաց այս անգամ փոքր-ինչ լսելի ձայնով.

– Խորա՛ծ, եսպէս չեն ասի:

Թարգմանը կրկնեց նրա խօսքերը.

– Խորա՛ծ, էշպեշ ցեն աշի:

Մայրը բարկանալով անհմուտ թարգմանի տգիտութեան վրայ, այս անգամին անելի սաստիկ խթեց նրա կողքին: Սալբին օրօրոեցաւ, ուզում էր ընկնել գետին, բայց հագիւ կարողանալով պահել իրան փոքրիկ ոտների վրայ, տհաճութեամբ հարցրուց.

– Բա՛, ինցպէ՞շ աշեմ:

– Գլուխդ թաղե՛մ, գիժ սատանայ, տե՛ս, եղպէս ասա՛ – ախպեր, բա ես խեղճ չե՛մ, ամէնը գնում են ուխտ, ես մնում եմ տանը:

Սալբին հաղորդեց ինձ.

– Գլուխդ թաղե՛մ, գիժ շատանա...